

# Nan Umunaay Suyat Pablo An Timoteo

## *Nan Mipangkop Sannaja Suyat*

Sa'ad as Timoteo mernus gway namati gway ijAsia Minor. Sa'ad nan inana Hudyu ja sa'ad nan amana Griego. Nangngachan huyun ja atuyungan Pablo san terwhasuna san mipangkop an Apudyus.

Agwad nan tuyu napatog gway whayugwon Pablo gway iwhaka san umunaay suyatna an Timoteo. Sa'ad nan umuna iwhakana nan oon Timoteo tot ijachina nan wha'on kus ustuway sussuyu gway nerpu ekay san somsono' nan taku. Nan mi'aggwa, ingwhakan Pablo gway maserpu ustu nan ukalin nan mangipangpangu sasan namati ja ustu ahos nan oon chanan namati san makimukimungancha. Sa'ad nan anungus nan suyatna, ingwhakana an Timoteo nan oona tot umamamod humayu nan i'amannaay mangisuyu san mipangkop an Kristu Hesus ja popotpotana nan pammatina.

## **Chanan Hu'yona**

Nan Lugyukin Nan suyat 1:1-2

Nan Mipangkop Sasan Wha'on Kus Tuttuwa

Nan Isuyucha 1:3-11

Nan Nanjamanan Pablo An Apudyus Kapu San Achakuna 1:12-20

Nan Tudtuchu Mipangkop San Manchajagwan Chanan Namati 2:1-15

Chanan Mangngachan Mangipangpangu Sasan  
 Namati Ja Mangngachan Atuyungancha 3:1-  
 13  
 Nan Mangiwhagan Pablo San Pangkopna  
 Gway Nanuyat 3:14-16  
 Tudtuchu An Timoteo Mipangkop San Mansil-  
 silwhiyan An Kristu 4:1-16  
 Tudtuchu Mipangkop Sasan Nan'aya'ayasi  
 Taku San Kimung 5:1-6:2  
 Tudtuchu Mipangkop San Mangipatokan San  
 Pila' 6:3-10  
 Nan Tudtuchun Pablo An Timoteo Ja Anungus  
 Nan Tudtuchu Sasan Namati 6:11-21

<sup>1</sup> As Pablo na gway nachutu'an as apostol Kristu Hesus. Chinutu'ana' an Apudyus gway manaku an chita'u ja as Kristu Hesus gway sija nan merpugwan nan namnama ta'u.

<sup>2</sup> Annaja suyat'u an si'a, Timoteo, gway iwhilang'us kadto'ay ana"u san pammati.

Ta'okot nu as Apudyus gway Ama ja as Kristu Hesus gway Apu ta'u nan mangipaila an si'a san inawhayucha, san achakucha ja pawhayugwoncha nan whijagnu.

*Nan Mipangkop Sasan Wha'on Kus Tuttuwa Nan Isuyucha*

<sup>3</sup> Anna iwhaka' asin chay ingwhakawhaka' an si'a gway oom say ummaja' ad Macedonia gway ainnugwam ad asnatay Efeso ta iwhakam peeka iwhaka sasay uchumay takud asnatay achicha isuyu nan wha'wha"onay sussuyu.

<sup>4</sup> Iwhakam peeka iwhaka an chicha ta achicha chongchongyon nan uullit ekay gway inggwan

chanan taku ja nan mipangkop sasan achi ap'appungay auullitan nan mipangkop sasan ummunaay taku san agwi gway oyog as manisisi'an. Ipayosgwana nan a'amasna ja maid kun iwhachangcha san ma'gwaan nan pangkop Apudyus gway maakammugwan kapu san pammati.

<sup>5</sup> Sa'ad nan pangkop nannaja ingwhaka' tot manisihayu chanan namati gway merpu san por'asay somsono', maid kun pangkop as sawhali ja merpu san kadto'ay pammati.

<sup>6</sup> Sa'ad chachay mangisussuyu san wha'wha'on nanchu'kancha nannachaja sussuyu kun patinajunay manisisi'cha.

<sup>7</sup> Whayugwonchaay mangngachan mimistuyun nan lintog Apudyus gway inatodna an Moses gwon achicha kun maagwatan nan ana'anancha gwinnu nan mipangkop san ipapilitchaay ananchaon tuttuwa.

<sup>8</sup> Akammu ta'uway whayu nan lintog Apudyus nu usayon nan osa taku gway ustu.

<sup>9</sup> Akammu ta'u hosay sa'ad nan lintog wha'on kus na'gwa kapu sasan takuway mamatpati san lintog Apudyus gwon na'gwa kapu sasan achi kun mamatpati san lintog, sasan nayu'u, sasan mallagwing gway manchajaw an Apudyus, sasan humersuwthersu, sasan wha'on kus mamigwhig an Apudyus, sasan manguya an Apudyus, sasan mangtoy san amacha ja inacha, sasan manootoy,

<sup>10</sup> sasan manggwamangwas whayangna awhawhain ja ina'aisaw gway pijaon nan longag, sasan laya'iyay mangibog san asillaya'icha, sasan takuway mangila'ya'u san asintatakucha, sasan

tuliyán, sasan mangisapata san tuli ja sasan manggwa san achi kun umajun san ustuguay sussuyu.

<sup>11</sup> Nan ustuguay sussuyu nerpu san Whyuway Chamag gway intayo' Apudyus an sa'on gway ipaakammu'. Nannaja Whyuway Chamag nerpu an Apudyus gway a'erjad ja machaychajaw.

*Nan Nanjamanan Pablo An Apudyus Kapu San Achakuna  
(Apostoles 8:3; 9:3-19)*

<sup>12</sup> Manjamana' an Kristu Hesus gway Apu ta'u gway nangatod an sa'on san pigsa gway manggwa san ipa'gwana an sa'on. Ingwhilangnas sa'on as mantayo'an ja pinilinas sa'on as mansilwhi an sija.

<sup>13</sup> Ta'on nu ingwhakawhaka' san agwi nan mihursu an sija ja pinalpalikata' ancha inamsaamsiw'us sija san nanggwaa' san lagwing sasan takuna, inachakugwana' an Apudyus kapu tan achi' kun akammu nan inggwa'inggwa' ja chaana' kun mamati an sija.

<sup>14</sup> Amod cha'or nan inawhayun Apudyus gway impailana an sa'on gway nahurnan san pammati ja lajad gway nerpu an Kristu Hesus.

<sup>15</sup> Annaja nan kadto'ay ukud gway maserpu lobhongnaay agwaton ja tuttugwaon gway sa'ad as Kristu Hesus ummalid asna luta ta takuwona chanan humersuwthersu. Sa'on nan aamochan nan whersuna an chicha.

<sup>16</sup> Sijachi nan kapuway inachakugwana' an Apudyus tot kapu an sa'on gway aamchan san

whersu, ipailan Hesu Kristu nan maid uyang-naay anusna tot mangilan chanan takuway mamati an sija as tapin chi erkaw ad na'awhijagcha an Apudyus as ingkaingkana.

<sup>17</sup> Mawhigwhig ja machajaw as ingkaingkana nan Ali gway maid kun pungpungna gway achi kun matmatoy ja achi kun maila gway sija nan osossa"anay Apudyus. Amen!\*

*Ingwhakan Pablo An Timoteo Gway Popotpotana Nan Pammatina*

<sup>18</sup> Sa'ad nannachaja iwhilin'u an si'a Timoteo gway ana"u san pammati, umajun san anan chachay profeta san mipangkop an si'a, chachi otjan nan mangipapigsa san somsono'nu tot ilawhannuway ustu nan atuttugwaan gway mipangkop san Whayuway Chamag

<sup>19</sup> gway popotpotam nan pammatis ja nan por'as gway somsono'nu. Nan uchumay taku lagwingoncha por'as nan somsono'cha kun tinangkaancha nan pammatischa.

<sup>20</sup> Mitapi an chicha cha Himeneo an Alejandro gway impawhijang'u an Satanas tot masuyuwanchaay achi manapapat san mihursu an Apudyus.

## 2

*Nan Tudtuchu Mipangkop San Manchajagwan Chanan Namati  
(1 Pedro 3:1-7)*

---

\* **1:17 1:17** Sa'ad nan "Amen" apapat nan Hebreo gway nan whayugwona anan "Sija" gwinnu "Oon". Usayon chanan Hudyu san pungpung nan lugwayucha tot mangipaila gway sa'ad nan lugwayun nan osa tachunan nan losan.

<sup>1</sup> Ad nan apatkan san losan, anna amma' iwhaka an si'a gway i'chagwanju an Apudyus nan losanay taku as maserpucha ja ilugwayuwanju chicha ja man'ochaw ajus whachang Apudyus an chicha ancha ijamanjus chicha an Apudyus.

<sup>2</sup> Ilugwayuwanju nan losanay ali ja nan losanay nangatu nan saadcha san kuwhilnu ta mawhijag ta'uway gwajagwaja ja whawhal-luan as mangipaila gway mangapudyus ta'u ja mawhigwhig ta'u san uchum.

<sup>3</sup> Amaschi nan ustu ja sijana nan masoman Apudyus gway Manaku an chita'u.

<sup>4</sup> Whayugwonaay takuwon nan losanay taku ja maakammugwancha nan atuttugwaan.

<sup>5</sup> Tan osossa'an nan Apudyus ja osossa'an nan mangisa'usa' sasan taku an Apudyus gway as Kristu Hesus.

<sup>6</sup> Nangngachan takus sija kun inatodna nan whijagna as oyos nan whijag nan losanay taku ta magwajagwajaancha san whersu. Na'gwa nan-naja san ustuguay chimpu gway pinilin Apudyus ad sijana nan impailanaay whayugwona gway matakun nan losanay taku.

<sup>7</sup> Sijana nan kapun nan nanutu'an Apudyus an sa'on as mangipaakammu san Whayuguay Chamag ja man'apostol ancha mansuyu sasan wha'on kus Hudyu san mipangkop san tuttuwaay pammati. Tuttuwa nan iwhagwhaka', wha'ona' kus mantutulli.

<sup>8</sup> Ad sija whayugwo' nan nu agwannasnatay maayusan chanan namati whayugwo'ay sa'ad

chanan lallaya'iyay mallugwayu gway mangin-gatu sasan imacha gway nachayus nan som-somo'cha an Apudyus, maid kun lingucha gwinnu wha'on kus sissija nan isi' san som-somo'cha.

<sup>9</sup> Ad sa'ad chanan hubhuwhai hos whayugwo'ay sa'ad nu manamammacha, urnusoncha nan insissilupcha. Achicha amchon gway maneerti san huu'cha ja achicha amchonay mansipat, manongong ja malluwhay san huyagwan gwinnu perlas ancha manuser san man'anginaay luput

<sup>10</sup> gwon nan mijaya san hubhuwhaiyay kadto'ay mamigwhig an Apudyus, kapu san manggwaancha san whayu.

<sup>11</sup> Sa'ad chanan hubhuwhai ikikinno'cha san manchongyancha san ukud Apudyus gway maserpu chumngorcha sasan mansuyu an chicha.

<sup>12</sup> Achi' kun ijuja chanan hubhuwhaiyay mansuyu gwinnu mangituyay san lallaya'i; maserpuway ikikinno'cha.

<sup>13</sup> Tan as Adam nan ummunaay inggwan Apudyus kun asiyot as Eba.

<sup>14</sup> Ad wha'on ku an Adam nan naallilaw gwon sija naallilaw nan huwhai kun sinuplingna nan whilin Apudyus.

<sup>15</sup> Gwon matakun nan huwhai kapu san umana'ana nu ituttuttuyuyuna san pammatina ja san lajadna san asintatakuna ja naurnus as sija ancha atchona nan whijagna gway mansilwhi an Apudyus.

### 3

#### *Chanan Mangngachan Mangipangpangu Sasan Namati (Tito 1:6-9)*

<sup>1</sup> Tuttuwa nannaja ukud gway sa'ad nu agwad osas mamayuway mangngachan mangipangpangu sasan namati, whayu nannaja terwhasuway whayugwona.

<sup>2</sup> Maserpuway sa'ad nan mangipangpangu sasan namati, maid kun ma'gwaniyana. Osa nan asagwana, naattom, naannad, whigwhikon nan takus sija, tijangnga ja anna nan lobhongnaay mansuyu.

<sup>3</sup> Wha'on kus huttongan, wha'on kus naujung jon lumoy, wha'on kus kochong as isi' ja wha'on kus sija ipatogna nan pila'.

<sup>4</sup> Maserpu akammuna manginungnung san wherjanna ja chumngor nan anana'na an sija ja whigwhikonchas sija.

<sup>5</sup> Tan nu maid akammunaay manginungnung san wherjanna, ininona manay mangaygwan sasan maayuayus gway namati an Apudyus?

<sup>6</sup> Maserpu wha'on kus assosoyo' san pammati tan tugwakay pumangas as sija ad nachusa as isun nan nachusaan Satanas.

<sup>7</sup> Ad maserpu hosay whayu nan a'a'gwaniyana sasan achi kun mamati tot achis sija maamsiw ja ma'na san ayayyu' Chijabyu.

#### *Nan Mangngachan Atuyungan Chanan Mangipangpangu Sasan Namati*

<sup>8</sup> Isuna hosay sa'ad chanan atuyungan chanan mangipangpangu sasan namati maserpuway



whigwhikon nan taku chicha. Wha'on kus nangkotap nan chilacha, wha'oncha kus huttongan ja achicha kun mangkamkam san pila'.

<sup>9</sup> Maserpu popotpotancha nan nipaakamuway atuttugwaan mipangkop san pammati gway maid kun pangkopchas lagwing.

<sup>10</sup> Ad maserpu hosay mapachascha jan, ad nu maid ma'ma'gwaniyancha mawhalincha gway mansilwhi as atuyungan chanan mangipangpangu sasan namati.

<sup>11</sup> Sa'ad chanan hubhuwhai isuna hosay maserpu whigwhikon chanan taku chicha; achicha mampergwipergwing, naattomcha ja ikakadto'chaay manggwa san losanay ooncha.

<sup>12</sup> Sa'ad chanan mangngachan atuyungan chanan mangipangpangu sasan namati maserpuway osa asagwacha ja maserpu hosay akammuchaay manginungnung gway ustu san anana'cha ja ahumerjancha.

<sup>13</sup> Tan sa'ad chanan atuyungan chanan mangipangpangu sasan namati gway ustu nan ini-nonchaay mansilwhi, maayacha nan mawhigwhikancha ja natuyodchaay manukud san mipangkop san pammaticha an Kristu Hesus.

### *Nan Nangiwhagan Pablo San Pangkopna Gway Nanuyat*

<sup>14</sup> Ta'on nu isuyat'u an si'a nannachaja, namnamao' gway umali mangila an si'a san wha'on otjan as mawhajag.

<sup>15</sup> Gwon nu miperjod nan umaliya', maakam-mugwam sannaja suyat nan ininonay mawhijag nan gwaschi osa gway nitapi san wherjan

Apudyus gway chachi nan namati an Apudyus gway mawhiwhijag. Sa'ad chanan namati an Apudyus chicha nan amas tu'ud ja tamang nan hoyoy gway misasaachan nan atuttugwaan.

<sup>16</sup> Ad maid kun chugwachugwan nan inapatog nan atuttugwaan gway sussuyu gway impaakam-mun Apudyus an chita'u:

Ummalis sija gway nangngachan taku,

Impano'no' nan Ispilitun Apudyus as sija,

Inilan chanan a'anghel as sija.

Nipaakammu nan mipangkop an sija san ailiili,

Kun tinuttuwan chanan taku ad asna luta,

Gwot nipangatud langit.

## 4

### *Chanan Mangisuyu San Wha'wha'on (1 Timoteo 1:3-11; 2 Pedro 2; Judas 8-13)*

<sup>1</sup> Ingwhawhagkan nan Ispilitun Apudyus gway sa'ad san umaliyay udchin nan erkaw, ijakay chanan uchumay taku san pammaticha. Sija chongyoncha nan sussuyuway nerpu sasan chimunjuway mangalallilaw.

<sup>2</sup> Nan a'ammazna sussuyu nerpucha sasan takuway nayuppati'ay tuliyan gway maid ekay sigmoncha.

<sup>3</sup> Ijachicha nan mangasagwa ja mangan san uchumay ma'an gway inggwan Apudyus as mawhalinay anon chanan namati ja mangakammu san atuttugwaan nu mappungcha ijaman san lugwayu.

<sup>4</sup> Tan losanay inggwan Apudyus whayu, maid kun mijachi nu ijamantaay mangagwat.

<sup>5</sup> Tan miwhilangay pummor'as nan ma'an kapu san ukud Apudyus ja kapu san lugwayu.

*Nan Whyuway Mansilsilwhi An Hesu Kristu  
(2 Timoteo 2:14-26)*

<sup>6</sup> Mangwhalin'a whyuway mansilsilwhi an Kristu Hesus nu isuyum nannachaja tudtuchu san susunud ta'uway namati. Ad san mangisuyuwam sannachaja, machogwachogwan nan akammum san mipangkop san pammati ja ustuwaiy sussuyu gway sinuyutnu.

<sup>7</sup> Achim chongchongyon chanan wha'on kus masoman Apudyus ja uullit ekay gway inggwan chanan taku gwon paingsaom nan longagnu gway manggwa san masoman Apudyus.

<sup>8</sup> Tan nan longag gway paingsaonta unaton, anna nan atchona humayugwana gwon sinumamod whayu nan mangwhanakan nan manggwaan san masoman Apudyus san losanay whayangnas nat kapu tan aatchona nan whayu whijag san sana ja san umaliyay chimpu.

<sup>9</sup> Annaja nan kadto'ay ukud gway maserpu lobhongna as agwaton ja tuttugwaon.

<sup>10</sup> Annaja nan kapuway igka ta'u nan lobhong ta'uway mansilwhi an Apudyus ta'on nu malikatan ta'u kapu tan agwad nan namnamaon ta'u san mawhiwhijakay Apudyus gway sija nan Manaku san losanay taku amamod sasan mamati an sija.

<sup>11</sup> Iwhakam ja isuyum nannachaja.

<sup>12</sup> Achim ijujaay whawhangon cha'a kapu tan mernus'a gwon ipailamay si'a nan managwatan chanan namati san ininomay manukud, san kidkichum, san lajadnu san asintatakum, san pammatim ja san nachayusay somsono'nu.

<sup>13</sup> Ingkanas umaliya' ad asnat, maserpu patinajunnuway iwhasa nan Ukud Apudyus sasan maayuayus ja ipaagwatnu nan Ukud Apudyus an chicha ja patinajun'a gway mansuyu.

<sup>14</sup> Achim ligwatanay usayon nan inatod nan Ispilitun Apudyus an si'a gway ayobhonganay mangipangu sasan namati gway sachi nan nipadtu san nangipatajan chanan mangipangpangu sasan namati san imacha an si'a.

<sup>15</sup> Ipusannu nan somsono'nu sannachaja ja igkam nan lobhongnuway nan manggwa sannachaja ta ilan nan losanay taku nan umoy gway hummayugwan nan o'oom.

<sup>16</sup> Ammam ilan nan ininomay matakua ja ammam ilan nan isuyum. Ituttuyuyunway manggwa sannachaja tan kapu san manggwaam sannaja, matakua nan longagnu ja chanan manchongor an si'a.

## 5

### *Nan Whijangon Gway Oon Sasan Chacha'or Ja Man'amernusay Namati*

*(Tito 2:1-15)*

<sup>1</sup> Sa'ad nan laya'iyay cha'or an si'a, achim jangjangan, maserpu whayu nan i'amannuway ma'apapat an sija as isun nan amam. Ad

sa'ad chanan lallaya'iyay whananog an si'a, iwhilangnu as isun na susunudnu.

<sup>2</sup> Iwhilangnu chanan man'amamadan as isun nan iinna ja iwhilangnu chanan man'amernusay hubhuwhai as isun nan susunudnu san nachayusay somsono'nu.

<sup>3</sup> Sa'ad chanan nawhayu gway kadto'ay manserpus whachang whigwhikom ja whachangam chicha.

<sup>4</sup> Nu agwad anana' gwinnu aappun nan nawhayu, maserpu ooncha janay umuna nan whijangcha san wherjantha gway sachi nan ingwhilin nan pammatica ja ta sumuwhalittha sasan sinaanna' an chicha tan sijana nan maso-man Apudyus.

<sup>5</sup> Nan nawhayuway kadto'ay manserpus whachang gway maid kun ahumerjanna, mannannama an Apudyus ja ituttuyuyunay man'ochaw as whachang ja mallugwayu an sija san nilawhi ja inerkaw.

<sup>6</sup> Gwon nan nawhayuway sija o'oonan nan whayugwon nan longagna, isun chi natoy ta'on nu matattakus sija.

<sup>7</sup> Ad nannachaja tudtuchu, iwhilinnu sasan namati ta maid ma'gwaniyantha.

<sup>8</sup> Ad nu ngachan nan achi mangijamuut san chochogkana, amamod sasan ahumerjanna, nanchu'kana nan pammatica ad amamod pay gway lagwing as sija san achi mamati.

<sup>9</sup> Sa'ad nan nawhayu gway milista san listaan chanan nawhayu, chay man'onompuyu ja agwad nan tagwonna gway osossa'an nan asagwana.

10 Ad maserpuway whayu nan achamakana san whayuway inggwa'ingwana isun nan whayuway nangipacha'oyana san anana'na, san nangipailana san nammangiliyana, san nangisuwana san i'in chanan takun Apudyus, san hummachangana sasan maliglikatan ja san nangipapatiyanaay nanggwa san losanay ayasin nan whayu.

11 Sa'ad chanan man'amernusay nawhayu achim ilista chicha san listaan chanan nawhayu tan nu mangyog nan whayugwon nan longagcha nu nan mansilwhiyancha an Kristu, whayugwonchaay mangasagwa asin.

12 Nan manggwaancha san amasna mau'umcha kapu tan nilabsingcha nan chamuway ingwhawhagkacha gway achicha mangasagwa.

13 Osa pay masuyuwanchaay sumachut ja sajangoncha nan chimpuchaay umoy mangka'aka'ay san ahoyohoyoy. Ja wha'on ekas sumachutcha jon tup'otup'oncha hos nan uchumay taku ja miwhijawhijangcha gway apaapatoncha nan achi otjan maapapat.

14 Sija nan whayugwo'ay mangasagwa ekay chanan man'amernusay nawhayu, umana'cha, ijamuutcha nan wherjancha tot achi maatchan chanan humursu an chita'u as chimpuway mangamsiw an chita'u.

15 Tan agwad nan uchumay nawhayu gway naahuscha nitunud an Satanas.

16 Nu agwad namati as huwhai as agwad chanan ahumerjanna gway nawhayu, maserpuway whachangana chicha ta achin

chanan maayuayus gway namati an Apudyus chachagsonon chicha ta ahus as mawhalinay mawhachangan chanan nawhayuway kadto'ay manserpus whachang.

*Nan Whijangon Sasan Mangipangpangu Sasan Namati*

<sup>17</sup> Sa'ad chanan mangipangpangu sasan namati gway whayu nan i'amanchaay mangipangyuy whigwhikonju chicha ja labhuwonju chichas ustu, amamod sasan nakakot gway mangipaakammu san Whayuway Chamag ja mangisuyu san ukud Apudyus.

<sup>18</sup> Tan anana san nilistaay Ukud Apudyus: "Achim hunguton nan tupo' nan wha'a nu manilili'om san kerkerwit"\* ja "Maserpuway mayabhuwanay ustu nan manterterwhasu."†

<sup>19</sup> Achim tuttugwaon nan ipawhersucha san mangipangpangu sasan namati nu wha'on as chugwa gwinnu tuyu nan mana'chor.

<sup>20</sup> Sa'ad chanan mangituttuyuy gway humersu amujuwam chicha san sangun nan aachugwan tot umogjat ahos nan uchum.

<sup>21</sup> Amma' iwhilin an si'a san mangilan Apudyus ja as Kristu Hesus ja chanan nachutu'anay a'anghel ta popotpotam nannachaja tudtuchu gway maid kun mat'on as whayugwom san manggwaam san ngachan sinatay oom.

*Nan Uchumay Impaisuyun Pablo An Timoteo*

<sup>22</sup> Achi'a manga"agway gway mangipatay san imam san whayangna taku as mangipangpangu

---

\* **5:18 5:18** Mawhasa sa Deuteronomio 25:4. † **5:18 5:18** Mawhasa san Lukas 10:7.

sasan namati gwinnu achi'a mitaptapi ma'a'gwa san whersun nan uchum. Iillam ta achi'a ma'awhersu.

<sup>23</sup> Wha'on ku' ahus nan chanum as inumom jon uminum'a hos as sina"it as whajas kapu san husugnuway nadnachiyon sumikab.

<sup>24</sup> Sa'ad nan whersun nan uchumay taku, mama"ila gway sija nan mangituyung san mau'umancha gwon nan whersun nan uchum asi mallotaw a' asi.

<sup>25</sup> Ad isuna hos nan whayuway o'oon gway mama"ila ad uyay chanan achi kun maila wha'on kus sissijaay mitayu.

## 6

### *Nan Sussuyu Mipangkop Sasan Mudchachu*

<sup>1</sup> Losanay mudchachuway namati maserpu whigwhikoncha chanan simmudchachu an chicha tot sa'ad nan ngachan Apudyus ja nan isussuyu ta'u, achi maamamang.

<sup>2</sup> Ja sa'ad chanan mudchachu gway namati chanan simmudchachu an chicha, maserpu achicha whawhangon chicha kapu tan susunudcha san pammati. Jon amamochotay isilwhiyancha chicha kapu tan sa'ad chanan manganab san terwhasucha, namati ja napatogcha an chicha.

Annachaja nan isuyum ja iwhakamay iwhaka an chicha.

### *Nan Mipangkop San Mangipatokan San Pila' (Santiago 5:1-6)*

<sup>3</sup> Nu agwad mangisuyu san sawhaliyay sussuyu gway achi kun umajun san ukud



Apu ta'uway Hesu Kristu ja san sussuyuway mangichayan an chita'u an Apudyus,

<sup>4</sup> amod nan pangasna ja maid kun maagwatana. Sa'itna nan ma'aisiisi' ja ma'asinsinnungwhat san mipangkop san ukud gway mangipahu'nag san apos, iisi', manapapat as lagwing ja manatap as lagwing.

<sup>5</sup> Ja sijasijaay ma'aisi' sasan taku gway lagwing nan somsomo'cha ja napyos nan atuttugwaan an chicha. Anancha kunnu kapu san mamatiyancha an Apudyus nan huma'nangancha.

<sup>6</sup> Tuttuwa kay gway cha'or nan makanabta san mamatiyan an Apudyus nu mapno'ta san anna an chita.

<sup>7</sup> Tan maid kun inghu'nag ta'u ad asna luhung san nijana'an ta'u ja wha'on kus ma'ailajaw ta'u san whayangna ad asna luhung san matojan ta'u.

<sup>8</sup> Nu agwad anon ja silup, mapno' ta'u.

<sup>9</sup> Gwon sa'ad chanan mamayuway huma'nang, maagwischa san sulisug ad na'nacha san maid kun kutu'na ja mampayagwing gway whayugwoncha oon gway oyog as matangkaan chanan taku.

<sup>10</sup> Tan nan mangipatokan san pila', sachi nan kapun nan losanay ayasin nan lagwing. Anna nan uchumay takuway amod nan mangipatokan cha san pila' gway sijachi nan nangijakan cha san pammaticha ad loogcha namachasan san amochay likat nan somsomo'cha.

*Nan Tudtuchun Pablo An Timoteo*

<sup>11</sup> Gwon sa'ad as si'a gway takun Apudyus, achajugwam chana. Maserpu itayo'nu nan somsomo'nu san manggwaam san whayugwon

Apudyus gway pa'gwa an si'a, mawhijag'a san masoman Apudyus, mantayo"a an Kristu as amod, ipatognu nan asintatakum, maserpu naat-tom'a ja lumoy'a san uchumay taku.

<sup>12</sup> Ikakadto'nuway mangiwhijag san pammattim tot ma'awhijag'a an Apudyus as ingkaingkana gway impaakammum sasan angsanay taku. Nannaja whijag sija nan kapun nan nangajakan Apudyus an si'a.

<sup>13</sup> Annaja nan iwhilin'u an si'a san mangilan Apudyus gway sija nan mangatod san whijag san losan. Iwhilin'u hos nannaja san mangilan Kristu Hesus gway nangipano'no' san atuttugwaan san sangun Poncio Pilato

<sup>14</sup> gway ingkanas managkulinan Apu ta'uway Hesu Kristu ikakadto'nu chumngor san tudtuchu gway maid kun man'uyangana ja maid a"agwaniyana.

<sup>15</sup> Nu humu'nag nan ustuguay chimpuna, sa'ad as Hesu Kristu ipailan Apudyus gway machay-chajaw ja osossa"anay mangituyay san losan, sija nan Alin chanan ali ja Apun chanan aappu.

<sup>16</sup> Sija ekay nan ahus as achi matoy. Ingkaw as sija san achi kun maachayukan gway silaw gway maid kun osas nangila an sija ja mawhalinay mangila an sija. Machajaw as sija ja maid kun pungpung nan ayobhongana!

### *Nan Anungus Nan Tudtuchu Sasan Namati*

<sup>17</sup> Sa'ad chanan whawha'nang gway namati, iwhakam ta achicha mamangpangas ja achicha mannamnama san inawha'nang gway mampat-ingka jon sija mannamnamaancha as Apudyus

gway wha'on kus na'imut gway mangatod san losanay maserpu tot kanason ta'u nan whijag.

<sup>18</sup> Iwhakam an chicha ta ooncha nan whayu, mampawha'ngacha san whayuway ooncha, nachayacha ja whayugwonchaay mangatod san uchum.

<sup>19</sup> San manggwaancha san amaschi, masikkutchi nan inawha'ngacha as tapin chi erkaw gway mangwhalin isun nan pagchotay pognad tot mawhalinay maayacha nan kadto'ay whijag gway maid kun pungpungna.

*Nan Anungus Nan Ingwhakan Pablo An Timoteo*

<sup>20</sup> Timoteo, popotpotam nan nitayo' an si'a. Achajugwam chanan ugugkud gway wha'on kus masoman Apudyus ja maid kun kutu'naay ma'aisiisi'an san anan nan uchumay takuwon "laing" gwon annaotay nipa'hot.

<sup>21</sup> Anna nan uchumay namati sannachaja sussuyu ad kapu sannaja, nanchu'kancha nan pammaticha. Ilugwayu' gway ipailan Apudyus nan inawhayuna an cha'aju.

**Kalinga, Butbut**  
**Kalinga, Butbut: Nan Ukud Apudyus (New**  
**Testament)**

copyright © 2019 Wycliffe Bible Translators, Inc.

Language: Butbut Kalinga

Contributor: TAP Philippines

All rights reserved.

2025-05-08

---

PDF generated using Haiola and XeLaTeX on 7 May 2025 from source files  
dated 8 May 2025

cffc8f8f-c832-513b-bc0d-76208ec72485